

PREDGOVOR:

Najvrijedniji resurs za budućnost naše zajednice su mladi ljudi, stoga trebamo bez razmišljanja ulagati u njih i njihov razvoj. Društvo, čiji članovi su savjesni, odgovorni i aktivni, te žele i znaju kako mogu učestvovati u životu svoje zajednice, je zdravo i funkcionalno društvo. Cilj naših programa u okviru omladinskog rada je upravo to, a mladi sa kojima radimo su dokaz da smo na dobrom putu. Kroz svoj rad, želimo im omogućiti pristup kvalitetnim programima i sadržajima, adekvatnu podršku educiranih omladinskih radnika, kao i prostor u kojem će moći iskazati svoj puni potencijal. Svake godine iz naših prostorija izlaze generacije uspješnih mladih ljudi, spremnih za samostalni život kao ravnopravni građani našeg društva, velikim dijelom zahvaljujući našem radu s njima.

OMLADINSKI RAD:

Kroz naše svakodnevne aktivnosti omladinskog rada, mlade ljude učimo ispravnim vrijednostima: jednakosti, nediskriminaciji, toleranciji, odgovornosti. Naši profesionalni omladinski radnici, koji su im ujedno i pozitivni uzori, neumorno rade na njihovom osnaživanju u savjesne, odgovorne i aktivne članove društva. Svi naši programi zasnovani su na promociji zdravih stilova života i kao takvi su u potpunosti „sober“, baš kao i prostorije u kojima radimo sa mladima. Naš rad sa mladima zasnovan je na njihovom dobrovoljnom učešću, testiranju vrijednosti i uvjerenja, te pripremi mladih na aktivno učešće umjesto pasivnog posmatranja društvenih događaja. Naš glavni alat na ovom polju je iskustveno učenje, u kojem su mladi aktivno uključeni u njegov proces i kroz praksu stiču različita znanja i vještine.

Druga kuća

Više od pedeset mladih ljudi iz Travnika svečano je otvorilo vrata svoje „Druge kuće“ u septembru ove godine. Nakon dvadeset godina uspješnog, ali i vrlo napornog rada, uspjeli smo, uz podršku brojnih prijatelja, osigurati jedinstven prostor za sve mlade iz Travnika, Centralne Bosne i šire. „Druga kuća“ naziv je koji su volonteri dali CEM-u, a sada će u istoimenom društvenom centru, uz podršku profesionalnih omladinskih radnika i pozitivnih uzora, moći ostvariti svoj puni potencijal. Programi centra, kreirani prema potrebama i interesovanjima mladih, odvijat će se u potpuno zdravom i sigurnom okruženju, bez alkohola, droga, duhanskih prerađevina i nasilja. Oko 2.000 mladih ljudi godišnje imat će priliku učestvovati u više od dvadeset naših stalnih programa, dok će kroz sve aktivnosti centra proći njih oko 10.000.

Stariji brat, starija sestra

I ova godina bila je prepuna lijepih priča i zajedničkih trenutaka naših „starije i mlađe braće i sestara“. Dvadeset parova volontera i djece za deset mjeseci programa provelo je ukupno 4.000 sati druženja i zajedničkih doživljaja, koji su ih povezali na jedinstven način, kroz prijateljstvo koje i jedne i druge uči iskrenosti, nesebičnosti, humanosti... Uz pomoć naših volontera, kao i ustanova koje su podržale ovaj program, nastavili smo vraćati osmijehe na lica djece iz socijalno nestabilnih zajednica. Uvezivanjem organizacija i relevantnih ustanova, uspjeli smo uspostaviti sistem podrške volonterima i djeci, čime smo ovom programu dali potpuno novu dimenziju.

Travel for Knowledge

Mobilnost mladih u svrhu učenja prepoznali smo kao vrlo bitan faktor njihovog razvoja u zrele i odgovorne ličnosti. Iz tog razloga smo ih i tokom ove godine nastavili ohrabrivati da učestvuju na internacionalnim razmjenama i studijskim posjetama, sklapaju nova prijateljstva i dožive trenutke za koje će imati priliku samo jednom u životu.

Dvadeset naših volontera imalo je priliku putovati na seminare u Hrvatsku i Estoniju, gdje su učili o poduzetništvu, zdravim stilovima života i ciljevima održivog razvoja. Seminari su im donijeli i mnogo korisnih vještina, poput timskog rada, komunikacije, pisanja projektnih prijedloga i sl. Sklopili su nova prijateljstva sa svojim vršnjacima iz cijele Europe, predstavili nas i našu državu u najboljem svjetlu i upoznali druge kulture i običaje.

U sklopu ovog programa bili smo i domaćini mladima iz nekoliko europskih zemalja. Njih oko 120 posjetilo nas je tokom ove godine. Zajedno sa našim volonterima, predstavili smo im naš rad, našu „Drugu kuću“, a imali smo vremena i za druženje i razmjenu iskustava.

Travel for Knowledge je program koji podržava internacionalne razmjene mladih u cilju učenja, upoznavanja novih kultura, predstavljanja sebe i svoje države, širenja vidika i unaprjeđenja jezičkih vještina.

CEM Omladinski fond

Da su mladi ljudi puni dobrih ideja, dokazuje upravo naš program „CEM Omladinski fond“. Kroz svakodnevni rad sa mladima, prepoznali smo njihov potencijal za kreiranje aktivnosti koje su zanimljive njihovim vršnjacima, pa smo pustili njihovoj mašti na volju i dobili dva sjajna omladinska projekta. „3x3 basket“ i „Ljetne olimpijske igre“ okupili su više od 200 mladih ljudi iz Travnik i Turbeta, koji su uživali u dva dana druženja, zabave, sporta i takmičenja, te pokazali svojim vršnjacima kako se živi zdravo.

CEM Omladinski fond je program koji prepoznaje potencijal mladih za kreiranje i realizaciju kreativnih i zanimljivih ideja, te im osigurava resurse za tu namjenu. Pored finansijskih resursa, mladi dobijaju i vještine neophodne za pisanje i realizaciju projekata, te se tako razvijaju i na ličnom planu.

Kreativni park

Naši volonteri i ove godine su imali priliku upoznati mlade, perspektivne i uspješne ljude, svoje „starije kolege“, koji su odlučili sa nama podijeliti priču o svom uspjehu. Backpacker i naš volonter Nermin Mameledžija pričao nam je o svom avanturističkom duhu i putovanjima koja uspijeva uklopiti u fakultetske obaveze. Kristian Babić, također naš volonter, zajedno sa još dvojicom kolega, podijelio je sa nama svoje iskustvo obrazovanja u internacionalnoj školi. Našim volonterima ova druženja bila su jako zanimljiva, ali i korisna, jer su kroz neobavezan razgovor saznali mnogo korisnih informacija i dobili neku vrstu recepta za uspjeh koji su naši gosti podijelili s njima.

Aktivnosti volontera/Naši mladi aktivisti...

S pravom možemo reći da su naše volonterke i volonteri naš ponos, ali i ponos cijele naše zajednice. 2017. godinu obilježile su mnogobrojne aktivnosti naših mladih aktivista, a izdvojili smo samo neke.

Dan volontera – Na ovogodišnjoj proslavi Dana volontera pridružili su nam se i roditelji naših volontera, koji nisu krili oduševljenje našim programima, te su sa zadovoljstvom podržali naš rad sa djecom i mladima. Zaslužno, Dan volontera obilježili smo i zabavom, koju smo organizovali u prostorijama CEM-a. Odlično smo se proveli uz karaoke party, muziku, ples, zakusku i bezalkoholne voćne koktele koje smo sami pripremili.

Socijalni dan - Sa velikim zadovoljstvom podržali smo „Socijalni dan“, projekat Asocijacije srednjoškolaca u BiH i ideju da mladi ljudi svojim angažmanom doprinose lokalnoj zajednici. Pet naših volonterki i volontera, zajedno sa nama iskusilo je jedan radni dan u Centru za edukaciju mladih. Ovo je bila prilika da iz prve ruke saznaju kako to funkcioniše njihova „Druga kuća“, te kako njihovi omladinski radnici pripremaju različite vrste aktivnosti.

Književna večer za mlade – Prošlog ljeta smo, u opuštenoj atmosferi travničkog predvečerja, organizovali književnu večer za mlade, u saradnji sa Gradskom bibliotekom Travnik. Naši volonteri su na centralnom gradskom trgu čitali odlomke svojih najdražih književnih djela, rušeći stereotip da su „digitalna generacija“, zatupljena nekvalitetnim sadržajima interneta, koja ne voli čitati, osim onoga što mora u školi.

Dječiji kreativni svijet – I u 2017. godini nastavili smo priču dječijeg kreativnog svijeta. Počeli smo na ljetu druženjem naših volontera sa djecom na gradskom trgu, a nastavili u prostorijama Gradske biblioteke Travnik. Ovim aktivnostima, kao i dosad, nastojimo djeci približiti kulturu čitanja, posebno u vremenu kada internet i novi mediji sve više zaokupljaju njihovu pažnju.

Građanski aktivizam – Vođeni željom da doprinesemo razvoju mladih u svjesne i odgovorne članove društva, nastavili smo ovaj program, kojim im želimo približiti način funkcionisanja vlasti u BiH, te ih motivisati da učestvuju u životu svoje zajednice. Deset polaznika ovog programa u nekoliko navrata posjetilo je sjednice Općinskog vijeća Travnik, a organizovali smo i simulaciju sjednice, kako bismo zajedno naučili kako funkcioniše ovo tijelo zakonodavne vlasti na lokalnom nivou.

Igre bez granica – I ove godine smo učestvovali u obilježavanju Dana općine Travnik, kroz još jednu zabavnu aktivnost, koju su za svoje sugrađane pripremili naši volonteri. U „Igrama bez granica“ učestvovali su naši najmlađi sugrađani, kao i oni malo stariji, a svi su se zabavili, te kroz igru naučili šta je to timski rad, kako se dijele zadaci u timu, kako se upravlja vremenom, kolika je važnost komunikacije unutar tima itd.

Radionice sa srednjoškolicima – Sa željom da omogućimo što većem broju mladih ljudi pristup našim aktivnostima, nije nam bilo teško izaći na teren i organizovati radionice za učenike srednjih škola, koji nisu u mogućnosti doći u naše prostorije. Nastavili smo saradnju sa srednjim školama u Travniku, te smo održali niz radionica o komunikaciji, javnom nastupu, upravljanju konfliktom, pisanju projektnih prijedloga, problemu izloženosti djece i mladih alkoholu, te nasilju nad ženama i djecom u BiH.

OBRAZOVNI PROGRAMI

Znajući da se većina vještina koje su potrebne za život i rad stiče upravo kroz neformalnu edukaciju, našim mladima prenosimo upravo tu vrstu znanja i vještina. Tokom cijele 2017. godine, implementirali smo niz edukacijskih programa, kroz koje je više od 1000 mladih iz cijele BiH steklo vještine iz oblasti komunikacije, javnog nastupa, upravljanja konfliktom, građanskog aktivizma, timskog rada, upravljanja projektnim ciklusom itd. Certificirali smo 20 omladinskih radnika za razvojni rad sa mladima, kako bi podrška mladima bila sveobuhvatna i dostupna i izvan nevladinog sektora (škole, javne ustanove, političke stranke i sl.). Naše obrazovne programe kreiramo prema stvarnim potrebama i interesovanjima mladih ljudi, prvenstveno iz Travnika i Centralne Bosne, ali i ostalih krajeva BiH.

Liderstvo i razvojni omladinski rad u zajednici

Bosna i Hercegovina bogatija je za dvadeset certificiranih omladinskih radnika, koji će mladima pružati pomoć i podršku u razvoju u aktivne, svjesne i odgovorne članove našeg društva. Na kursu smo okupili osobe različitih profesija (prosvjetni radnici, umjetnici, pedagozi, socijalni radnici, sportski treneri, politički i građanski aktivisti), koji su, kroz teoriju i praksu, osnaženi i obučeni za razvojni rad sa mladima u svom domenu djelovanja, na individualnom i grupnom nivou. Tokom trajanja kursa, studenti su realizovali i 250 radionica, okupivši više od stotinu mladih ljudi. Kurs „Liderstvo i razvojni omladinski rad u zajednici“ certificiran je od Univerziteta Jönköping iz Švedske.

Seka i Braco na šarenoj zebri

Seka i Braco su i ove godine, kroz interaktivnu predstavu, zajedno sa 200 travničkih prvačića, savladavali pravila o ponašanju pješaka u saobraćaju, sigurnom prelasku ulice na semaforu i pješačkom prelazu, kretanju pješaka duž pješačkih staza i trotoara, te sigurnom odlasku u školu i povratku kući. Izvođenje predstave organizovali smo u saradnji sa Policijskom stanicom Travnik, a pod pokroviteljstvom Helen Doron English Travnik.

Prevenција nasilja nad ženama i djecom

Mladi su ključni faktor za razvoj i napredak našeg društva, pa smo iz tog razloga odredili upravo njih kao ciljnu grupu za prevenciju transgeneracijskog prenošenja nasilja nad ženama i djecom. Okupili smo učenike srednjih škola iz pet općina Srednjobosanskog kantona i uveli ih u ovu tematiku. Kroz obuku za vršnjačke edukatore, osnažili smo oko stotinu njih za širenje priče o ovom problemu, nakon čega su oni samostalno educirali svoje vršnjake kroz edukativne radionice. Vrijednost ovog projekta prepoznalo je i kantonalno Ministarstvo obrazovanja, nauke, kulture i sporta, koje je podržalo naše aktivnosti, kao i škole koje su odlučile uzeti učešće u projektu.

Projekat „Transgeneracijsko prenošenje nasilja – prekidanje kruga zlostavljanja“ finansiran je kroz Fond ekonomske podrške Ministarstva vanjskih poslova Sjedinjenih Američkih Država.

JAVNO ZAGOVARANJE

Svi naši naponi usmjereni su na kreiranje zdravog i sigurnog okruženja za žene, djecu i mlade, u kojem oni ne smiju biti izloženi alkoholu, drugim drogama, duhanskim prerađevinama i nasilju. Želimo da javnost bude informisana o svim njihovim problemima i potrebama, te da se aktivno uključi u njihovo rješavanje. Iz tog razloga radimo na ukazivanju na probleme žena, djece i mladih, poput nasilja u porodici, izloženosti alkoholu, rizika od sukoba sa zakonom, te aktivno zagovaramo za sistemsko rješavanje ovih problema od strane donosilaca odluka. Aktivno radimo i na umrežavanju sa drugim institucijama i organizacijama, koje djeluju na ovom polju, u cilju što efikasnije zaštite i unaprjeđenja prava žena djece i mladih u BiH.

Travnik noćna utrka

Iako je tek druga godina, trkačka zajednica u BiH već je navikla na „najveću malu utrku“ i s nestrpljenjem je očekuje. Tako je Travnik u septembru ponovo bio trkački centar BiH, zahvaljujući Centru za edukaciju mladih i drugoj „Pharmamed Travnik noćnoj utrci“. Ove godine, utrka je okupila i poznate trkače i atletske reprezentativce BiH, poput Lucie Kimani, koja je odnijela pobjedu u ženskoj, te Osmana Junuzovića, koji je bio najbolji u muškoj konkurenciji. Cijela priča oko utrke odvijala se pod sloganom: „Inspiriši slobodu!“, s ciljem skretanja pažnje na izloženost djece i mladih alkoholu, njegovo nekontrolisano reklamiranje i lažnu slobodu, koja se na taj način predstavlja. Na ovogodišnjoj utrci učestvovalo je ukupno 1.000 takičara, uz prisustvo oko 4.000 gledatelja duž staze i podršku više od 130 ljudi iz organizacionog tima.

Skrivene sjene

Prepoznavši nasilje nad ženama i djecom kao ozbiljan problem u bh. društvu, intenzivno smo nastavili kampanju podizanja svijesti o ozbiljnosti ovog problema. Predstava „Skrivene sjene“ prepoznata je kao vrlo efikasna u propitivanju društva o ovom problemu, pa je ponovo izvedena izvan granica BiH, ovaj put u Srbiji. Predstava je dosad izvedena ukupno trinaest puta u deset gradova BiH i Srbije, a kampanju su podržali brojni bh. pozitivni uzori. Veliko interesovanje publike za predstavu, koje ne opada već skoro pet godina, govori nam da je problem nasilja nad ženama i djecom, nažalost, još uvijek aktuelan u bh. društvu, te da se svi trebamo aktivno uključiti u njegovo suzbijanje.

ALCOHOL FREE LIFESTYLE

Tokom cijele godine aktivno smo se zalagali za promociju i afirmisanje zdravih stilova života, te zaštitu i unaprjeđenje prava djece i mladih na zdravo i sigurno okruženje.

Naši napori za kreiranje zdravog i sigurnog okruženja za mlade ne odnose se samo na mlade sa kojima direktno radimo, nego na cijelu BiH. Tako smo i ove godine, u saradnji sa kantonalnim Ministarstvom obrazovanja, nauke, kulture i sporta, upozorili osnovne i srednje škole na opasnosti konzumiranja alkohola, te ih pozvali da preuzmu odgovornost za ponašanje učenika na ekskurzijama i maturskim proslavama.

Svojim aktivnostima na ovom polju obuhvatili smo i organizacije članice naše mreže „Životni stil bez alkohola“. Više od 50 njihovih članova prošlo je kroz naše ovogodišnje edukacijske programe na temu stila života bez alkohola. Pod pokroviteljstvom mreže ACTIVE – Sobriety, Friendship and Peace, organizovali smo tri treninga na temu društvenih mitova i alkohola, nametanja koja smo naslijedili od prošlih generacija, te odnosa pojedinca i društva prema alkoholu.

Nastavili smo umrežavanje sa institucijama i organizacijama koje rade na promociji zdravih stilova života. Učestvovali smo u planinarskom pohodu Pješaćenjem do zdravlja, u organizaciji našeg partnera – Zavoda za javno zdravstvo, te posjetili nekoliko organizacija članica naše mreže Alcohol Free Lifestyle, planirajući nove zajedničke aktivnosti. U saradnji sa srednjim školama u Travniku, sprovodili smo istraživanja o navikama mladih u konzumiranju alkohola, čije rezultate ćemo koristiti u našim zagovaračkim aktivnostima.

03. oktobra obilježili smo prvi globalni Drink Revolution dan, pridružujući se globalnoj zajednici koja promovira stil života bez alkohola i nudi alternativu za konzumiranje alkoholnih pića. Za naše volonterke i volontere organizovali smo zabavu povodom ovog dana, a uz muziku, druženje i zabavne igre, imali su priliku uživati u voćnim koktelima, napravljenim posebno za njih, prema receptima iz knjige Magic Drinks, koja je objavljena povodom ovog dana.

Tokom cijele godine organizovali smo alcohol free druženja mladih na centralnom gradskom trgu u Travniku. Naša prepoznatljiva aktivnost Healthy Mobile Bar i ove godine je mladima nudila dobru zabavu, uz muziku i DJ-a, kao i zdrave voćne koktele, bez alkohola. Svi koji su posjetili naš bar, poslali su poruku da alkohol nije i ne može biti sastavni dio dobrog provoda, a da su za stvaranje dobre atmosfere potrebni kreativni ljudi.

KAMPANJA 18+

Svi naši napori usmjereni su ka zaštiti i unapređenju prava djece i mladih na odrastanje u zdravom okruženju, u kojem ne smiju izloženi promociji alkohola, niti im on smije biti dostupan na svakom koraku. Iz tog razloga odlučili smo uvezati niz institucija i organizacija, kako bismo zajednički pristupili suzbijanju problema dostupnosti alkohola djeci i mladima u BiH.

Tokom cijele 2017. godine, naši volonteri, koji su, kroz učešće u našim programima, iz vlastitog iskustva osjetili šta znači zdravo i sigurno okruženje, pozivali su trgovce u Travniku da ne dozvole maloljetnicima kupovinu alkohola, jer je ona najveća, moralna odgovornost za to, upravo na njima. Naša akcija „Tajni kupac“, nakon pet godina, prvi put je dala pozitivne rezultate. Naši maloljetni volonteri nisu uspjeli kupiti alkoholna pića u trgovinama u Travniku, što je ogroman korak naprijed ka umanjivanju ovog problema.

Zajedno sa Ministarstvom unutrašnjih poslova i Policijskom upravom Travnik, uticali smo i na vozače, sa posebnim akcentom na mlade. Na terenu smo, zajedno sa policijskim službenicima, educirali

mlade vozače o opasnostima vožnje pod uticajem alkohola, te ih pozvali da preuzmu odgovornost za svoju, kao i sigurnost ostalih učesnika u saobraćaju.

Kao i dosad, tokom cijele godine prikupljali smo podatke o dostupnosti alkohola mladima na teritoriji cijele Federacije BiH. Održali smo dobru saradnju sa svim kantonalnim inspektoratima, koji su nam ustupali podatke o izrečenim kaznenim mjerama za kršenje zakona koji zabranjuju prodaju alkohola maloljetnicima, kao i ministarstvima unutrašnjih poslova, od kojih smo dobijali informacije o krivičnim djelima i prekršajima, uzrokovanim alkoholom.

Naša istraživanja obuhvatila su i mlade ljude, njihovo viđenje problema dostupnosti alkohola, kao i navike koje se tiču njegovog konzumiranja. Kroz već ostvarenu saradnju sa srednjim školama u Travniku, došli smo do podataka koje ćemo koristiti u našem daljnjem radu na ovoj problematici.

ZAPOŠLJAVANJE

Svjesni važnosti izgrađivanja vještina izvan formalnog obrazovanja, odlučili smo započeti djelovanje na polju zapošljavanja i razvijanja poduzetničkog duha kod mladih. Želimo stvoriti podsticajno okruženje za razvoj poduzetništva, ohrabriti i motivisati mlade da ostvaruju svoje biznis ideje. U okviru naših programa mladi imaju profesionalnu mentorsku podršku, edukaciju, te pristup fondovima i resursima neophodnim za razvoj njihovih poslovnih ideja.

Podsticajno okruženje za socijalno poduzetništvo i turizam za žene u BiH

S ciljem osnaživanja i motivisanja žena da se upuste u poduzetničke vode, kao i otklanjanja njihove ekonomske nejednakosti u društvu, zajedno sa partnerskom organizacijom „PiNA“ iz Slovenije, započeli smo projekat usmjeren jačanju podrške za socijalno poduzetništvo za žene.

U okviru projekta osnivamo i ženski inkubator socijalnog poduzetništva, kako bi učesnice razvijale svoje poslovne ideje, uz profesionalnu pomoć i podršku, te pristup resursima, neophodnim za realizaciju ideja.

TRIK za nove mogućnosti u zapošljavanju i poduzetništvu

Kako bi mladi u Travniku dobili adekvatnu podršku u samozapošljavanju, zajedno sa našim partnerima inicirali smo formiranje Lokalnog partnerstva za zapošljavanje Travnik, koje će raditi na unaprjeđenju konkurentnosti mladih ljudi na tržištu rada, te podržati samozapošljavanje mladih kroz osnivanje start-up preduzeća, te raditi na njihovoj motivaciji i osnaživanju da se upuste u poduzetničke vode.

Planirano je osnivanje biznis inkubatora, koji će mladima pružati poduzetničku obuku i obezbijediti im pristup opremi i infrastrukturi potrebnoj za pokretanje firmi, kao i uspostavljanje Fonda za podršku samozapošljavanju u općini Travnik, iz kojeg će se finansirati uspostavljanje novih preduzeća.

MREŽE

Naši naponi na kreiranju zdravog i sigurnog okruženja za djecu i mlade, obuhvataju i umrežavanje sa drugim organizacijama koje se bave istom temom, razmjenu iskustava i zajedničko djelovanje.

Koordinaciono tijelo za prevenciju maloljetničke delinkvencije

Kroz saradnju sa različitim institucijama i organizacijama iz oblasti zaštite prava žena, djece i mladih, inicirali smo formiranje Koordinacionog tijela za prevenciju maloljetničke delinkvencije u općini Travnik. Zadatak tijela je implementacija Akcionog plana prevencije maloljetničke delinkvencije, kao i

njegova revizija i dopunjavanje, te kreiranje alternativnih mjera za postupanje sa maloljetnicima u riziku od sukoba sa zakonom.

„Životni stil bez alkohola“

„Životni stil bez alkohola je neformalna mreža društveno odgovornih organizacija, čiji cilj je zaštita prava djece i mladih na zdravo i sigurno okruženje, kroz promociju stila života bez alkohola i drugih droga. Osnovana je 2011. godine, a dosad joj se priključilo 37 organizacija civilnog društva iz cijele BiH.

RIPPO

Jedan smo od inicijatora Mreže za razvoj i profesionalizaciju prevencije ovisnosti u BiH, koja ima za cilj svojim stručnim kapacitetima raditi na razvoju i realizaciji inovativnih pristupa i održivih programa, kako bi odgovorila na sve izraženiji problem ovisnosti kod djece i mladih, posebno u domenu novih medija, te drugih vrsta ovisnosti (alkohol, duhan, kanabis, igre na sreću i sl.).

Mreža će kontinuirano raditi i na usavršavanju stručnjaka/kinja u ovoj oblasti, te profesionalaca/ki koji u svakodnevnom radu imaju direktan dodir sa djecom i mladima (nastavno osoblje, stručne službe u školama, zdravstveni i socijalni radnici, sportska i kulturna udruženja i sl.).

Partnerstvo za BiH bez duhanskog dima

Partnerstvo za BiH bez duhanskog dima osnovalo je udruženje PROI iz Sarajeva, koje okuplja sve aktere i zainteresovane strane s ciljem realizacije kampanje zagovaranja za promjenu, usklađivanje i implementaciju zakona za kontrolu duhana. Partnerstvu smo se priključili na samom početku i aktivno djelujemo na zaštiti zdravlje stanovništva BiH kroz javno zagovaranje i uticanje na izmjenu politike kontrole duhana.

Stariji brat, starija sestra BIH

Projekat Stariji brat, starija sestra realizira se u šest bosanskohercegovačkih gradova. To su Sarajevo, Mostar, Banja Luka, Zenica, Tuzla i Travnik. Jedanaest organizacija iz ovih gradova je umreženo, s ciljem implementacije projekta po istim standardima kvalitete. Uprojekat je uključeno oko 160 djece i 160 volontera iz svih gradova.

IOGT International

IOGT International je globalna mreža organizacija, čija vizija su ljudi koji imaju slobodu da dostignu svoj puni potencijal, u okruženju bez alkohola i drugih droga, svijet mira, demokratije i pravde, gdje slobodni i zdravi građani aktivno doprinose društvu na svim nivoima. Neke od aktivnosti koje realizujemo u okviru ove mreže su: „Drink Revolution“, „Inspire Freedom“, „Big Alcohol Exposed“ itd.

ACTIVE

ACTIVE – Sobriety, Friendship and Peace je evropska krovna omladinska organizacija, u kojoj se nalazi 31 članica iz 24 europske zemlje, uključujući i CEM. Cilj mreže je motivisanje mladih da žive život bez alkohola i drugih droga, te aktivno učestvuju u stvaranju zdravog okruženja za sebe i svoje vršnjake.

PARTNERSTVA

Veliki broj institucija, ustanova i organizacija iz cijele BiH, prepoznao je vrijednost i kvalitet našeg rada na svim poljima, te su u nama vidjeli strateškog partnera u aktivnosima na unapređenju prava djece i

mladih. Nastavili smo umrežavanje i razmjenu iskustava sa našim partnerima, u cilju unapređenja našeg i njihovog rada, te osiguranja njegovog kvaliteta i što boljih rezultata.

Između ostalog, educirali smo učenike i studente o vršnjačkom nasilju, kroz Otvoreni forum „Vršnjačko nasilje nije moj izbor“, u organizaciji Univerziteta u Travniku.

Bili smo i suorganizatori „Male škole poduzetništva“ Sveučilišta/Univerziteta „Vitez“, razvijajući poduzetnički duh kod mladih i praveći prve korake ka otvaranju poslovnog inkubatora u našim prostorijama.

Dio smo i Lokalnog partnerstva za zapošljavanje Travnik, kroz koje aktivno pružamo podršku samozapošljavanju mladih u općini Travnik.

Na poziv Općine Travnik, postali smo dio tima za sprovođenje UN-ovih milenijskih ciljeva razvoja, usmjerenog ka poboljšanju cjelokupnog ambijenta življenja.

Kroz projekat „Razvoj i profesionalizacija prevencije ovisnosti“, u kojem također učestvujemo kao partner, upoznali smo se sa radom centara za prevenciju ovisnosti u Austriji. Stečena iskustva svakako ćemo primjenjivati kroz rad sa djecom i mladima u okviru našeg Društvenog centra „Druga kuća“.

Nastavili smo razvijati i partnerstvo sa Univerzitetom Jönköping iz Švedske, čiji studenti su upravo u našoj organizaciji stekli prva iskustva praktičnog rada na unapređenju ljudskih prava, sa akcentom na žene, djecu i mlade.